

“Entrenamento y calentamiento” pa eleccion 2017 a cuminza

Nos a drenta den e parti di calentamento, “**warm up**”, pa eleccion.. E entrenamiento di primavera, “**e spring training**” politico. Esaki ta mas oficial pa **MEP** cu a anuncia cu nan campaña a habri, locual no a tende oficial di ningun otro partido. E campaña indirecto di nan tey si, bo ta ripara y hasta mira esaki. Riba caya mi ta tende di kendenan no ta bolbe den **MEP** y nos sa kendenan a sali den transcurso di ultimo añanan.

Di **AVP** nos a ripara mescos y como cu nan ta e partido di gobernacion, esaki ta mas noticia ainda. **Otmar** a sali lanta su “**Forza Nobo**”, su partido “**Por**”. Te ainda mi no sa ta cual ta e partido su number, si ta “**Forza nobo**” of si ta “**Por**”. Pero manera **Otmar** a sali, **por** a ripara e campaña **anti Otmar** cu a cuminza di “**otro banda**”. Awor tur locual **el a haci y logra, no ta sirbi**.

Pero no por keda sin menciona aki cu di su banda tambe expresionnan contra e “**banda contrali**” di dje a tuma lugar. Awor diripientetambee “**banda contrali**” pa kende el a traha, no tabata husto.

Otmar a haya **Andin** pa cana band'i dje. **Andin** tambe a haya su critica di tur banda pa esaki y principalmente pasobra te ainda ningun hende sa si e ta cu “**Por**” (of “**Forza nobo**”) of cu “**PDR**”. E critica riba **Andin** di e “**bandanan**” no tabata pisa manera tabata riba “**Otmar**”, pasobra a pesar cu **Andin** ta lider di un partido, e peso ta mas riba e **forza** di voto di **Otmar**. E problema di **Andin** ta te ainda e decision cu mester cay tocante “**su partido**” di cual e no a distancia su mes (ainda).

E otro persona cu ta

menciona ta **Marisol** cu tambe a sali di **AVP** y uni cu e “**Forza**”. Awor **Marisol** a bira tambe figura grandi pa critica. Si bo no ta contento cu un partido, esun den cual bo ta, bo ta liber pa sali y busca otro partido pa apoya. Pero na Aruba si bo haci esaki, ta “**pica mortal religioso**” bo a haci y tur e miles di “**votador pecador**” cu ta cambia di partido segun cada eleccion, ta desea pa bo fracasa.

Segun rumornan ayera y cu mi por a scucha na un emisora di un “**cu a tende**”, politico **Alan Howell** ta bay uni cu “**e forza di Por**”. Ta bon cu politiconan aki no tabata politico den decada 70 y 80 sino tur di nan lo a haya e “**seyo barata**” di e tempo ey riba nan frente di: “**Traidor di patria**”. Ta bon cu e cos aki a baha. Esunnan mes cu **Reina Wilhelmina** a califica como “**traidor di patria**” durante guerra, a bira mas aprecia cu tur otro. E palabra “**traidor**” politico no tin peso mas, ni pa wordo usa..

CUAL ENCUESTA ?

Mi a tende un persona menciona ayera cu encuesta lo determina na **juni** con resultado di eleccion lo bay. “**Cual encuesta?**”. Mi a yega di skirbi riba asunto di encuesta y ta hayami ta ripiti tur ora cu eleccion y politiconan ta den noticia. Di encuestanan y sigui pa eleccion mes.

Hende tin fascinacion cu futuro y ora proceso electoral yega tur hende kier sa di antemano. Encuestanan rond mundo a bira algo masha particular pasobra nan ta bisabo: “**asina hendenan ta bay vota**”. Semper nan ta un muestra. Un muestra científico y un muestra mihor determina cu otro,

y hasta esun mihor, ta un **muestra e ta keda**. Den hopi caso ora e realidad presenta, basicamente e ta corecto maske ta parcialmente y hopi bez cu un porcentahe halto cu e muestra y resultado di e encuesta. Pero cu un regularidad continuo y constante, e resultado no ta loke e encuesta a proba di ta.

Nos a caba di mire cu **Brexit** caminda e dia prome cu e voto, encuestanan importante tabatabisacu “**Remain!**” (keda den Europa) lo sali. **Pero sali for di Europa a gana cu 48-42**.

Tin e famoso margen di error tambe. Nan ta bisabo cu e margen ta 3 por ciento mas o menos. Esaki ta nifica cu loke ta parce victoria, facilmente por bolter den derota.

Tuma eleccion di Merca por ehemplo caminda tur hende a kere cu **Clinton** lo gana y esey te na ultimo oranan. Na Aruba tambe tin encuesta pero semper nos a pensa cu ora puntra hende cos tocante politica y tocante maneho di gobierno, tocante gobernantenan etc., **ta mas interesante bo puntra: Kico bo ta kere cu gobierno mester paga mas atencion na dje. Con bo ta haya cu tal area mester ta? Ki enfasis mester duna na desaroyo di cual topico? Cuanto importancia enseñanza mester haya? Con ta para cu desaroyo economico? Kico nos ta haciendo relaciona cu cultura? Kico lo bo pensa cu lo bo haci diferente? Den cada un di e areanan aki; con ta haci cu salud publico y con ta haci cu esfuerzonan di prevencion etc.**

Nos tin e pensamiento aki na Aruba cu ora bo haci e preguntanan asina bo por haya contesta masha creible. Bo margen di error por baha considerablemente. Pero ora bo puntra e

Arubano pa kende bo ta bay vota, bo no ta haya contesta “**Clai!**”. Hopi lo lagabo tende: “**No ta bo asunto!**” Sinembargo nan ta bisti cu t-shirt di nan partido, cu banderín na auto, di nan partido y bandera gigantesco na cas, di nan partido.

Pero ora di vota, bo orientacion principal ta bo bienestar. Bienestar di bo, di bo famia, di bo pais. Los for di bo orientacion cu generalmente ta dominante ora bo dicide di vota, bo sa cu despues cu bo vota, tin procesonan di gobierno y bo voto ta pa cierto partido cu por ta den coalicion of no.

Pero bo permanencia despues ta cu “**e gobierno ta di bo. No ta importa pa ken bo a vota**”.

Si gobierno no ta haci cosnan manera bo ta desea pa e bay, e ta **keda toch bo gobierno.. Ta un gobierno tin. Y e gobierno cu bo tin ami tin. Esun cu ami tin, tur otro hende tin**. No ta asunto cu cada un di nos tin un gobierno diferente. Anto e ora ey, despues di un proceso, basicamente bo mihor cos ta pa logra, pusha y spera; pa reza y implora y pidi yudanza di “**donde sea**” pa e gobernacion ta mihor posibel. Esaki ta locual ta favorecebo.

Na final di e careda bo ta haci bo determinacion y si bo ta analiza tur cos bon, bo ta determina bo voto pa e proximo. Bo voto ta un di e tanto decenas di mil cu finalmente ta bay dicide ta cual ta bay bira gobernantenan.

Mientras tanto tin un gobierno bo no por tin e deseo pa cos bay malo. **Si cos bay malo e ta bay malo pa bo tambe**. Bo mester tin e deseo pa cos bay bon. **Esaki ta combiní bo**. Si bo orientacion politico

ta diferente, of si tin cierto cos cu durante gobernacion bo no a gusta, e cos importante ta pa bo purba hala, sea cu ta djs speranza, of cu accion directo, pa cos drecha.

Ta ora cos drecha, ta e ora ey so abo, bo famia y bo pais ta bay dilanti.

Anto esey no ta relevante pa bo orientacion of favorecimiento politico, pasobra esey bo ta keda cune.

Bo ta eherce esey manera bo ke. Ora e gobernacion caba bo por dicide cu “**nan a haci tal cos basta bon, pero ami ta vota pa esun di mi cu no tabata den e gobernacion. Bo ta keda vota pa esun di bo. Bo ta keda cu e libertad y derecho fundamental y sagrado ey**. For di awor caba Bo tin cu desea cos bon. Bo tin cu lucha pa cos bon. Final di cuenta, tene cuenta; un mas cu otro; pa ki gobernante cu bo tin, cos por bay bon unicamente cu apoyo generaliza, pa gobernacion compronde con cos mester bay.

Pa bo ta atento; pa bo duna sugerencia; pa bo duna specialmente critica constructivo, pasobra bo tin derecho di critica, especialmente ora bo bisa cu cos no ta bon pa si no haci gran esfuerzo bo bisa: “**mi ta sugeri pa bo haci'e tal manera!**”

Esaki no ta kita nada for di bo favorito politico pa cual bo a vota, of lo bay vota pe, of cambia pa ken abo kier, ora bo kier.

Ora tin gobierno, ta un gobierno tin. Di bo, di mi, y di nos tur. Anto ta na nos interes pa e gobierno keda, sea cu e ta y haci lo mihor posibel. Pakico? Pasobra esey ta e frutonan cu nos tur por piki. Otro manera, e problema tey pa tur hende... **Ken ta desea esey?**

Juby Naar